



*Kamis, 02 Mei 2024*

**Ogen : Job 8:8-15**



**Begiken Kata Kalak Pentar**



Sekalok bendahara pembagunen, rajin kel erbahan laporen keuangan. Teptep wari ibahanna laporen keuangan si enggo ialokenna subuk arah kartu donatur bage pe proposal. Momo enda imasukkenna ku bas group ngawan perpulungen. Bage me silakokenna alu tujun segelah momo e nambahi semangat perpulungen i bas ngelaken kartu undangan koyak. La terjeng si e momo enda pe nuriken maka ia bendahara si bujur. I bas sada paksa ibahan me lelang-lelang guna pengumpulen dana. I bas lelang-lelang e terpepulung sen, lit si lunas ras si langa lunas. E maka bagi semalna ibahanna laporen enggo asakai sen si terpepulung ras seh bas paksa si e. Ertina sen chas si enggo isetorken ku rekening panitia. Sada paksa ibegina ranan mambur-mambur maka pembukuan siibahanna e kurang pasna. Ranan e erbahanca ceda kel ukurna. Adi enggo bage sikapna ku bahan engkai maka bage kel nina melasken ranan si erbahanca ceda ukur. Bage me lalap ngeranai bas pusuhna, piah nina latihan kel kuakap pandita megri ranan si bage rupana?

Pernah nge latihan kel siakap ertangkel erkiteken ranan kalak sideban? Jujurna pernah, ranan si begiken kita e mereken ngaruh si mbelin kel ku bas perukuren, kesehaten ras semangatta. Kune sibegiken ranan si mereken semangat maka la banci lang dungna kita pe semangat, tapi adi sibegiken ranan si encedai pusuh maka dungna kote me. Uga dage carana segelah kita tetap megegeh dengen reh pentarna i bas ndalani wari-wari? Kitab Job ngajuk kita mperdiateken kebenaran si lit. Langa bo kerina si begi e benar, e maka siksikilah lebe, payo entah lang berita si begiken e. La terjeng si e pentar pe megiken ise kin si man beginken? Bahanlah kalak pentar si ngajari geluhta, usurlah megiken pengajaren kalak pentar sabap belinen ngaruh si ku kiniulin asangkan megiken kalak si la erpengangka nuri-nuri. Melala kalak ngerana, tapi labo kerina banci maba kepentaren. Guna sie bas wari pendidiken enda ibabai kita megiken ranan kalak pentar dengen mereken ranan si dem bas kepentaren.

✎ *“Begikénlah ranan simereken kepentaren”*





